

Den restauracion di ex Havenkantoor y ex Museo Arkeologico

Tanto arkitekto como contratistanan ta contento con trabounan ta canando y di traha cu Gabinete Mike Eman II y Monumentenbureau

"NOS ta trahando dia y anochi y hasta weekend, pero satisfecho cu loke ta saliendo afo," asina arkitekto Serge Thijzen a duna di conoce e siman aki y ta refleha e positivismo y satisfaccion cu ta reina entre e ekiponan a cargo di e restauracionnan di e edificacionan monumental di ex Havenkantoor na Schuttestraat y ex Museo Arkeologico na Zoutmanstraat. E bon resultado ta danki den

gran parti na e comunicacion excelente cu tin entre Gabinete Mike Eman II pa medio di Minister di Asuntonan General Mike Eman y Minister di Infraestructura Benny Sevinger, Monumentenbureau, arkitektonan y contratistanan local encarga. Naturalmente, den tur tipo di construccion semper tin imprevistonan y den un restauracion a demostra di esey ta e caso mas ainda.



Sin embargo, e ekipo ta supervisa constantemente tur aspecto di e trabounan y pesey por maneha tur loke ta presenta. "Nos tin confianza den loke nos a siña p'e y ta bayendo tremendo," arkitekto Thijzen a bisa refiriendo na su mes, colega Jouel Croes como tambe e contratistanan Van Den Broek Construction y Albo Aruba N.V. Ambos arkitekto ta aplaudi e vision di Gabinete Mike Eman, no solamente di rescata e monumentonan historico, pero di duna nan, como profesionalnan Arubiano, e oportunidad di ehecuta e responsabilidad aki. Manera Sr. Thijzen a bisa, "Ta grandi pa nos Aruba mantene nos historia, no solamente di e hendenan cu a haci algo pero tambe den su edificacionan." Anno Postma, como lider di e proyecto den nomber di Albo Aruba N.V. a splica cu no ta nan prome proyecto di e tipo aki, pero sigur un mas complica cu normal y esey ta dor di tur e de-

tayenan cu mester tene cuenta cune. E comunicacion tabata clave pa asina tur hende ta riba mesun liña y satisfecho cu loke ta wordo haci. Segun e contract, e proyecto di ex Havenkantoor mester keda cla pa mita di luna di Mei, pero e contratista tin otro plan. "Pa nos mes, nos a pone fin di februari y tur cos ta muestra cu nos ta bay logr'e," Sr. Postma a bisa. Den e caso di ex Museo Arkeologico na Zoutmanstraat, e arkitekto na mando ta e hoben Jouel Croes. E ta splica cu tabata un honor pa forma parti di e ekipo tras di e restauracion di e monumento aki. "E restauracion tabata hopi intensivo, aunke apariencia por muestra otro. Den transcurso di añanan tabatin hopi cambio riba e edificio y esey a haci dificil pa trece bek na su estado original. Mester hacie mas detaya posibel pa cumpli cu e reglanan internacional." Tur partido envolvi ta compronde esey y ta traha

pa e mesun meta. "Nos ta sperando pronto di por completa e proyecto aki cu gran exito," Sr. Croes a bisa.

Pa Van Den Broek Construction, esaki si ta nan prome restauracion. E ta mustRANDO di ta un experiencia hopi enriquecedor y cu ta manehando profesionalmente. Su representante a duna di conoce cu nan ta purbando pa keda cla na tempo y "mane cu e ta muestra te awo, e lo ta facil pa logra esey."

E restauracionnan aki ta forma parti di e vision di Gabinete Mike Eman I y II pa renoba y revitalisa centronan di ciudad, sigui pa henter e isla. Durante ultimo cuater aña a restaura y rescate joyanan di nos historia manera Watertoren di Oranjestad y San Nicolas como tambe Corte y asina ta bay sigui cu mantencion di e monumentonan di Censo, Contraloria General y pronto tambe lo cuminsa cu edificio di DOW y John F. Kennedyschool.